

Brinckman, John: Möllergesellen (1842)

1 Dor prügeln de Möllergesellen
2 dor baben all wedder sick af;
3 nu will ick di mal wat vertellen,
4 un sünd't ok man olle Kamellen
5 un dösch ick man leddiges Kaff.

6 De Winter – de Winter de kümmt nu,
7 un wenn vör din Dönsk he nu sitt,
8 dat pickelsteenkolt is dor buten,
9 denn kriegen witt Blömers de Ruten,
10 witt Blömers as Lilgen so witt.

11 Un schint denn de Vullmand dor achter,
12 denn blänkern de Ruten so blank
13 in richtige Eddelsteenpracht se,
14 denn blitzen so hell in de Nacht se,
15 as wiren rod' Rosen dormank.

16 Un bullert denn lustig din Aben,
17 is warm dat, wu dull dat ok friert,
18 ründüm di un ünne un baben,
19 un wust denn den Winter nich laben,
20 denn büst du sonn Winter nich wirt.

21 Dor prügeln de Möllergesellen
22 dor baben all wedder sick af;
23 nu möt ick di noch wat vertellen,
24 un sünd't ok man olle Kamellen
25 un dösch ick man leddiges Kaff.

26 Din Winter – din Winter de kümmt nu.
27 Kik, wu up din Schullern he sitt!
28 As wirst du'n richtigen Möller,

29 so hett all instöwt di dat Öller,
30 so witt büst, allæwer so witt.

31 De Frost de hett snurrig väl Blömers
32 di malt üm din Ogen un Münd;
33 'ne kakelsnaksche Ort Bläder
34 hett teekent dat rusig oll Wäder
35 grad æwer din Branen di ründ.

36 De Blomen de sehn all so duff ut,
37 un säd ick: smuck laten se di,
38 un wat as'n Struß se utsegen,
39 denn müßt as'n Spitzbow ick leegen,
40 un denn wir keen wohr Wurt dorbi.

41 Brennst achter din Ruten in'n Aben
42 du æwerst dat richtige Holt,
43 is hell in din'n Kopp di dat baben,
44 denn wœl wi din'n Winter di laben,
45 denn büst du, denn würrst du nich olt.

46 Un gläuh't gor din Hart dor noch achter,
47 denn blänkern de Blomen so blank
48 in richtige Eddelsteenpracht se,
49 denn blitzten so hell dörch de Nacht se,
50 as wir'n rod' Rosen dormank.

51 Dor prügeln de Möllergesellen
52 dor baben all wedder sick af;
53 dat müßt ick di doch man vertellen,
54 un sünd't ok man olle Kamellen
55 un dösch ick man leddiges Kaff!